

ጳጵሮስ ጳፌዳ ኮይሮ ኪታ ገሉዋ

የሱስ ኪቴዳ ጳጵሮስ ጳፌዳ ኮይሮ ኪታይ ጳፈቴዳዌ፣ ሄ ኪታ ግደን “ደረቴዳ ጳሳ አሳቱዋ” ጌተቲደ ዴሰትያን ቁር ኢስያን ሁጺሳ ባጋ ሻኩዋን ላለቴዳ አማንያዋንቱሳ። ሀ ኪታ ዋና ቆፋይ፣ አማኑዋ ጋሱዋን መቱነ ዋዪ ጋኬዳዋንታ ምንሳናሳነ መንግሳናሳ። ጳፌ ሀዋ ኦልያዌ አ ሀይቁዋ፣ አ ደንዲዋ፣ አ ላኤንሉ ዩሳ ኦድያ የሱስ ክርስቶሳ ምሽራቹዋ ቃላ ናባብያዋንታ ሀሳይሰያዋና። ኡንቱንቱ የሱስ ክርስቶሳ ደኡዋ ሌምሱዋዳን አኪደ፣ መቱዋ ገንጨደ አቆናዳን ሀሳይሴ። ሀዋና እትፕ ጋልያ ዎደ፣ መቱ ኡንቱንቱ አማኑዋ ጸልታተላ ፓጫያዋን የሱስ ክርስቶስ ቆንጫያ ጋላስ ኡንቱንቱ በሰያ ጋትያ አካናዉ ደእያዋ ኡንቱንታ ሀሳይሴ።

ጳፌ፣ ኡንቱንቱ መቱዋን ገንጫና ማላ መንግሳያዋ ቦላካ፣ ክርስቶሳ ካልያዋንቱ ደእያዋዳን ኡንቱንቱ ደአናዳን ቆፍሴ።

ሸምፓቱዋ ኡባቶ እመቴዳ ቃንላ ቆፋቱዋ

ገሉዋ 1:1-2

ጳሳ አሹዋባ 1:3-12

ጌዬዳ ደኡዋ ደአናዳን እመቴዳ ማቁዋ 1:13—2:10

መቱዋ ዎደ አማንያ አሳይ ኦላና በሰያ አዎተላ 2:11—4:19

አማንያ አሳ አሽከተላነ ኦሱዋ 5:1-11

ዉርሰላ ቁትያ 5:12-14

1 ታን፣ የሱስ ክርስቶስ ኪቴዳ ጳጵሮስ፣ ጳሳይ ዶሬዳ አሳቶ ጳንጳሳ ጋድያን፣ ጋላትያ ጋድያን፣ ቃጳደቅያ ጋድያን፣ ኢስያ ቢታንነ ቢታንያ ጋድያን በትያን ደእያዋንቶ ዳብዳቢያ ጳፋይ።

2 የሱስ ክርስቶሳዉ ህንተ አዛዘታና ማላነ አ ሱላን ጌያና ማላ፣ ጳሳይ አዉ ዶሬዳ ህንተንቶ ባረ አያናን ጌሼዳዋንቶ፣ አጼ ኬካተላይነ ሳርተላይ ግደ።

ደኡዋ እማና ጌዳ ሀደታ

3 ኑን ጳሳ፣ ኑ ጎዳ የሱስ ክርስቶሳ አዉዋ፣ ባረ ማርተላ ዳሩዋዳንካ ኑና ላኤንሉዋ የሌዳዋ፣ የሱስ ክርስቶሳ ሀይቁዋፕ ደንጩዳዋን ኑዉ ደኡዋ ሀደታ እሜዳዋ ጋላቱቶ።

4 ቃይ ጸሳይ ህንተንቶ እማና ዳሮ ላታይ ዋቀናዌ፡ ባየናዌን ጳየናዌ ሳሉዋን ናጌ።

5 ሄዌካ ህንተንቶ፡ ጸሳ ዋልቃን አማኑዋን ናገት ኡቲደ፡ አቶተላዉ ጊጌዳዋንቶ ዉርሰላ ዋድያን ቆንጫናዋ።

6 ሀእ ጉላ ዋደዉ ሀራይ አቶ ዲማ ዲማ ፓጭያን ህንተ ፓጫታናዉ ኮሾፕካ፡ ሀዋን ዳሮ ናሸትተ።

7 ሄዌ ሀራይ አቶ፡ ታማን የግና ጳይያ ዋርቃፕካ ህንተ አማኑ ዳሮ አልእነ ባል ባይናዋ ግድያዋ በሳናሳ፤ ያቲደ የሱሰ ክርሰቶሰ ቤትያ ዋደ፡ ጋላታ፡ ቦንቹዋን ሳባ ህንተ አካና።

8-9 ህንተ አ ኤራና ጳዮፕካ፡ ሲቁታ፤ ህንተ ሀእ አ በአና ጳዮፕካ፡ አማኒታ። ቃይ ህንተ ህንተ አማና ፖሎ ግድያ ህንተ ሸምፑዋ አቶተላ አክያ ድራዉ፡ ኦዳናዉ ዳንዳየተና ቦንቹ ኩሜዳ ናሸቻ ናሸቲታ።

10 ጸሳይ ህንተንቶ እማና አቶ ኬካተላባዉ ትምቢትያ ኦዳዳ ናባቱ ሎይላ ብዲደ፡ ሀ አቶተላባ ኮዬድና።

11 ኡንቱንቱን ደእያ ክርሰቶሳ አያናይ ክርሰቶሳ ቱጋባነ ሄዋፕ ጉይያን ያና ቦንቹዋባ ካሰቲደ ማርካቲደ፡ አዉደ ዋይ ዋኔዳ ዋድያን ያነንቶን አኬክሴዳዋዳን፡ ኡንቱንቱ ኮዬድና።

12 ሄ ትምቢትያ ኦድያዋንቱ ኦፊዳ አሱ ህንተሳፕ አትን፡ ኡንቱንቱ ሁጲያሳ ግደናዋ ጸሳይ ኡንቱንቶ ቆንጭሴዳ፤ ሀእ ህንተ ሰሴዳ ምሽራቹዋ ቃላ ህንተንቶ ኦዳዳ አሳቱ፡ ባረዉ ሳሉዋፕ ከተቲዳ ጌሻ አያና ዋልቃን ኦዳድና። ሄዋ ኪታንቻቱካ በአናዉ አሞቲና።

ጌሻተላን ደእያዋ

13 ሄዋ ድራዉ፡ ኦሱዋ ኦላናዉ ህንተ ዋዛናን ቆፋ ገግሲደ ህንተ ሁጲያ ናግተ። የሱሰ ክርሰቶሰ ቆንጭያ ዋደ አቶ ኬካተላ ህንተ አክያ ድራዉ፡ ኩሙንላ ህደታን ናግተ።

14 ጸሳዉ አዛዘትያ ናናዳን፤ ህንተ ካሰ ኤረናን አሞቴዳ አሙዋ ካሎፕተ።

15-16 ሸን ህንተና ጴሴዳ ጸሳይ ጌሻ ግዳዳዋዳን፡ ህንተካ ህንተ ኦሱዋ ኡባን ጌሻ ግድተ። ጸሳ ማጻፋን፡ “ታን ጌሻ ግድያ ድራዉ፡ ህንተካ ጌሻ ግድተ” ጌተቲደ ጸፈቲዳ።

17 አሳ ሁጲያን ሁጲያን ዳሙዋ ጴላናን አ ኦሱዋዳን ፕርድያ ጸሳ ዋሲደ ህንተ፡ “ኑ አቦ” ጊደ አ ጴሰያዋ ግድፕ፡ ሀ አላምያን በተ ግዲደ ህንተ ደእያ ዋድያን ያሻተላን ደእተ።

18-19 ህንተ ህንተ እዎቹዋጥ ላቴዳ ፓር ደኡዋጥ ዎዘቴዳዌ፡ ጳይያ ብራ ዎይ ዎርቃ ማላና ግደናዎ ኤሪታ፤ ቦርሰያባይ ዎይ ቅታይ ባይና ደርሳ ሱፋዳን፡ አልኦ ክርሰቶሳ ሱፋን ህንተ ዎዘቴዳታ።

20 ጸሳይ ሳኦይ መታናጥ ካሰ ክርሰቶሳ ደር ዎሌዳ፤ ሸን ህንተ ድራዉ፡ ሀ ዎድያ ዉርሰፋን እ ቤቴዳ።

21 ህንተ እማኑነ ህንተ አካና ጊደ ናሸቻን ናግ ኡቴዳባይ ጸሳን ደኦና ማላ፡ ጸሳይ ሀይቁዋጥ አ ደንሊደ፡ አዉ ቦንቹዎ እጫዳዎ አን እማኒታ።

22 ቱማተፋዉ ህንተ አዛዘትያዎን፡ ሎአ ማላትያ ኢታተፋይ ባይናን ህንተ እሻቱዎ ሲቃናዉ ህንተ ሁጲያ ጌሺደ፡ እቱ እቱዎና ምንሲደ ዎዛናጥ ሲቀትተ።

23 ህንተ ሀይቂያ ዘረፋጥ ላኤንሉዎ የለትቦይክታ፤ ሸን መድናዉ ደእያዎን ሰንፋዉካ ደኦና ጸሳ ቃላን ሀይቀና ዘረፋጥ የለቴዳታ።

24 እያዉ ጎጥ፡ ጸሳ ማጻፋይ፡ “አሳይ ኡባይ ማታ ማላ፤ አ ቦንቹ ኡባይካ ማታ ጨሻ ማላ። ማታይ መሌ፤ ጨሻይካ ቆቆፈቴ።

25 ሸን ጎዳ ቃላይ መድናዉ ደኤ” ያጌ። ሀዌ ህንተንቶ ጎዳይ ኦዴዳ ምሽራቹዎ ቃላ።

2

ደኡዎ ሹቻነ ጌሻ አሳ

1 ሄዎ ድራዉ፡ ህንተጥ ኢታተፋ ኡባ፡ ጭምያዎ ኡባ፡ ሎአ ማላትያ ኢታተፋ፡ ቃናትያነ ዝግርሳ ኡባ ድግተ።

2-3 ጎዳይ ኬካ ግዴዳዎ ህንተ ደኡዎን ቦኤዳዎ ግዶጥ፡ ሀእ የለቴዳ ጋጭኖ ናናቱዎዳን፡ ኡሺደ ድጫናዉነ አታናዉ ጽሎ ግዴዳ አያና ማላ ላሞትተ።

4 ጎዳኮ ደኦ ሹቻኮ ሺቅተ። አሳይ አ እጹዳ፤ ሸን ጸሳ ማታን አ ደረቴዳ አልኦ።

5 ህንተካ ቃይ ደኦ ሹቻዳን፡ ጌሻ ቁሳ ግዲደ፡ የሱሰ ክርሰቶሳ ባጋና ጸሳ ናሸቻያ አያና ያርሹዎ ጸሳዉ ያርሻናዉ፡ ህንተ ህንተ ሁጲዉ አያና ኬፋዳን ኬጸትተ።

1:24 ኢሳ. 40:6-8 2:2-3 ማዘ. 34:8

6 አያው ጎጥ፣ ጸሳ ማጻፋይ፣ “በእተ፣ ታን ጽዮን ግያ ካታማን ጎልያ ጎዳ ጸጹዋ ምንሰያ፣ ድረቴዳ፣ አልኦ ሹቻ ዋላይ፤ እን አማንያ ኦንነ ዬላተና” ያጌ።

7 ሄዋ ድራው፣ ሀ ሹቻይ ህንተንቶ አማንያዋንቶ ዳር አልእ፤ ሸን አማንናዋንቶ፣ “ግምቢያዋንቱ ካጴዳ ሹቻይ ጎዳ ጸጹዋ ምንሰያ፣ ኡባፕ አጵያ ሹቻ ግዴዳ” ያጌ።

8 ቃይካ፣ “ሀ ሹቻይ አሳ ጴቢያ ሹቻን አሳ ኩንድሰያ ዛላ” ያጌ፤ ኡንቱንቱ ጸሳ ቃላ አማንና ድራው፣ ኡንቱንቶ ካሰና ቆፈቴዳዋዳን ጴቢቴድኖ።

9 ሸን ጸሳይ ጴማፕ ማላልሰያ ባረ ፖኦ ህንተና ጴሴዳ፤ ህንተ ኦ ኦራሳ ኦሱዋ ኦዳናው ድረቴዳ ዛረ፤ ህንተ ካትያ ቄሳቱዋ፤ ጌሻ አሳን ጸሳው ቡዞ አሳ።

10 ህንተ ካሰ ጸሳ አሳ ግድክታ፤ ሸን ሀእ ህንተ ኦ አሳ፤ ህንተ ካሰ ማርተላ አክባይክታ፤ ሸን ሀእ ማርተላ አኬድታ።

ጸሳ አይላቱዋ

11 ታ ዳባቶ፣ ህንተ ሀ ሳኦን አማላን ባተ ግዲደ ደእያዋንታ ግዴዳዋዳን፣ ኡባ ዋደ ህንተ ሸምፑዋና ኦለትያ አሳተላ አሙዋፕ ህንተ ሃካና ማላ፣ ታን ህንተና ዋሳይ።

12 አማንና አሳይ ህንተና ኢታባ ኦልያዋንቱዳን ዝግርያ ዋደ፣ ክርሰቶሰ ይያ ጋላሰ ህንተ ሎኦ ኦሱዋ ኡንቱንቱ አኬኪደ፣ ጸሳ ጋላታና ማላ፣ ህንተ ደኡዋ ኡንቱንቱ ግደን ሎይሰ ናግተ።

13 ጎዳ ድራው፣ አሳ ህግያ ኡባው ሞደትተ፤ ካቲካ ኡባፕ ቦላ ግድያ ድራው፣ አው ሞደትተ።

14 ቃይ ጋድያ ሞድያዋንቶካ ሞደትተ። አያው ጎጥ፣ ኡንቱንቱ ኢታባ ኦልያዋንታ ሙራናውን ሎኦባ ኦልያዋንታ ጋላታናው ካትያፕ ከተቴድኖ።

15 አያው ጎጥ፣ ጸሳይ ህንተ ህንተ ሎኦ ኦሱዋን ካጵያ ኤያ አሳቱዋ ሃሳያ ጮኡ ኡዳናዋ ኮዬ።

16 አይለተላፕ ከሲደ፣ ጸሳ አይልያዳን ደእተፕ አትን፣ ሄ አይለተላፕ ከሴዳዋ ኢታተላ ገንልያዋ ኦሶፕተ።

17 አሳ ኡባ ቦንቶተ። ህንተ እሻቱዋ ሲቅተ። ጸሳው ያይተ። ካትያ ቦንቶተ።

ክርሰቶሳ ጋኬዳ መቱዋ ለምሱዋ

2:6 አሳ. 28:16 2:8 አሳ. 8:14-15 2:9 ከሳ 19:5-6፤ አሳ. 43:20፣ 21፤ ዛረ. 4:20፤ 7:6፤ 14:2፤ ቲቶ 2:14፤ አሳ. 9:2 2:10 ሆስ 2:23

18 አይላቶ፡ ህንተ ሎኦ ጎዳቱዋ ጸላላውን አሸከ ጎዳቱዋ ጸላላው ግደናን፡ ኢታቶካ ዳር ያዪደ ሞደትተ።

19 አያው ጎጥ፡ አሳይ ናቂያ ዋደ ዋየትያ ኡራይ ጸሳ ቆጥደ፡ ኦገ ባይናን ናቀቶጥ ጸሳይ አ አንጃና።

20 አያው ጎጥ፡ ህንተ ናጋራ ኦሰና፡ ህንተና ደቕያ ዋደ፡ ህንተ ዳንዳዮጥ፡ ህንተንቶ አይ ኃላታይ ደኢ? ሽን ሎኦባ ኦሊደ ዋይያ ህንተ ዳንዳዮጥ፡ ጸሳይ ህንተና ሄዋ አንጃና።

21 ጸሳይ ህንተና ጴሴዳዌ ሄዋ ድራሳ፤ አያው ጎጥ፡ ክርሰቶሰ ህንተንቶ ዋየቱ፤ ህንተ አ ቃታማ ካላና ማላ፡ ህንተንቶ ሌምሱዋ ግዳዳ።

22 ናጋራ አ ኦሰቤና፤ ባረ ዶናጥ ዋርዱዋ ሃሳይቤና።

23 አሳይ ባረና ቦርያ ዋደ፡ ዛሪደ ቦርቤና፤ ዋየትያ ዋደካ ማንድቤና። ሽን ጽሉዋ ጥርድያ ጸሳው ባረና ኦሊደ አሜዳ።

24 ኦን ናጋራው ሀይቂደ፡ ጽሎተላው ደአና ማላ፡ ክርሰቶሰ ባረ ሁጳው ባረ አሹዋን ኦ ናጋራ ማሰቃልያን ቶኬዳ፤ ህንተ አ ማይላን ፓጴድታ።

25 አያው ጎጥ፡ ህንተ ኦጊ ባሌዳ ደርሳ ማላ፤ ሽን ሀአ ህንተ ሸምቼዋ ሄምያዋኮን ናግያዋኮ ሰሜድታ።

3

አሰናባን ማቕያባ

1-2 ሄዋዳንካ ማቼቶ፡ ህንተ አሰናቱዋጥ ጸሳ ቃላው አዛዘተና እቱ እቱ ደኦጥካ፡ ህንተ ፓሉመተናን፡ ኡንቱንቱ ህንተ ያሻተላን ህንተ ጌሻ ደኡዋ በኢደ ጸነታና ማላ፡ ኡንቱንቶ ሞደትተ።

3 ህንተ ህንተ ሁጲያ አልኦባን ገግሰያዋንን ዋርቃ ዋላያዋን ዋይ አልኦ ማዩዋ ማይያዋን ህንተንቱ ቦላ ባጋ ሎይሶጥተ።

4 ሽን ህንተ ኃርሳን ቆሰቲዳ አሳተላ ሎኦተላይ ጸሳ ሰንላን ህንተንቶ ዳር አልኦ ግዲደ፡ ጳየና አሸከን ዋቼ ጌዳ አያና ግደ።

5 አያው ጎጥ፡ ሄዋዳን ጸሳን ሀድቲዳ ጌሻ ማጫ አሳቱ በን ዋደ ባረንቱ አሰናው ሞደቲደ፡ ባረንታ ዳር ሎይሴድና።

6 ሄዋዳን ሳራ አብራሃማ፡ “ታ ጎዳው” ያጋ ጴሳደ፡ አው አዛዘታዱ፤ ህንተካ እትባውን ያየናን ሎኦባ አላጥ፡ አ ናናቱዋ።

7 ሄዋዳን አሰናቶ፡ ህንተ ማጫ አሳቱዋና አኬካን እትጥ ደአተ። ኡንቱንቶ ዳቡራንቻ አሳተላይ ደአያ ድራው፡ ኡንቱንታ ቦንቸተ፤

2:22 አሳ. 53:9 2:23 አሳ. 53:7 2:24 አሳ. 53:5 2:25 አሳ. 53:6 3:6 ዶመላ 18:12

ህንተ ዎሳይ ጹበተና ማላ፣ ጸሳይ እሜዳ ደኡዎ አጹ ከካተላ ኡንቱንቱ ህንተናና እትፕ ላትና።

ሎኦባ ኦሲደ መቼዎ አክያዎ

8 ወርሰላን፣ ኡባይ እት ቆፋን ደእተ። እቱ እቶ ቃረትተ፤ እሻቱዎዳን ሲቀትተ፤ ቃይ እቱ እቶ ከክያዎንታን ህንተ ሁጲያ ካወሸያዎንታ ግድተ።

9 ኢታ ድራዉ ኢታ ዎይ ሸቃ ድራዉ ሸቃ ዛርፕተ፤ ሄዎ አጊደ፣ ጸሳይ ህንተንቱ አንጂዎ ላታናዳን ህንተና ጸሴዳ ድራዉ፣ አንጅተ።

10 አያዉ ጎፕ፣ ጸሳ ማጸፋይ ሀዎዳን ያጌ፤ “ደኡዎ ዶስያዌን ሎኦ ጋላሳ በአናዉ ኮይያዌ ኦና ግድፕን ባረ እንጸርሳን ኢታባ ሃሳይያዎን ዎርዱዎ ኦድያዎ አጎ።

11 “ኢታባ ኦሳያዎ አጊደ፣ ሎኦባ ኦሶ፤ ሳርተላካ ሎይላ ኮዮን ካላናዉ ባጸቶ።

12 “አያዉ ጎፕ፣ ጎዳ አይፊ ጽሎቱዎኮ ጸሌ፤ ቃይ አ ሀይላይ ኡባ ዎደ ኡንቱንቱ ዎሳዉ ዶያ ደኤ። ሸን ጎዳይ ኢታባ ኦሳያዎንታ ባረ ሀንቁዎ ሶምእያን ጸሌ” ያጌ።

13 ህንተ ሎኦባ ኦሳናዉ አዎቶፕ፣ ህንተና ቆሀናዌ ኦኔ?

14 ሸን ሀራይ አቶ፣ ጽሎተላ ድራዉ ህንተ ዎየቶፕካ፣ አንጀቲዳዎንታ። አሳዉ ያዮፕተን ሀርጎፕተ።

15 ሸን ክርሰቶሳ ህንተ ዎዛናን ቦንቶተን አ ህንተ ጎዳ አላተ። ጸሳይ ህንተንቶ ህደቲዳ ደኦ ጋሱዎ ኦቶያ ኦስን ዛሩዎ እማናዉ ኡባ ዎደ ጊግ ኡትተ፤

16 ሸን ሄዎ አሸከተላንን ያሻተላን አላተ። ቃይ ክርሰቶሳን ህንተ ደእያ ሎኦ ደኡዎ ኢታባ ኦሴዳዎዳን፣ ህንተ ቦላን ኢታባ ሃሳይያ አሳይ ባረ ዝግርያዎን ዬላታና ማላ፣ ህንተ ዎዛናይ ጌሻ ግድ።

17 አያዉ ጎፕ፣ ጸሳይ ጌዳዎ ግድፕ፣ ኢታባ ኦሴዳ ድራዉ ዎየትያዎፕ፣ ሎኦባ ኦሴዳ ድራዉ ዎየትያዌ ከካ።

18 አያዉ ጎፕ፣ ክርሰቶስ ኦና ጸሳኮ አፋናዉ፣ ባረዉ ጽሎ ግዲደ፣ ማካላንቻቱዎ ድራዉ፣ እት ገደ ኡባ ናጋራዉ ሀይቄዳ፤ እ ባረ አሳተላን ሀይቄዳ፤ ሸን አያናን ፓጾዳ።

19 ቃይ ሄ አያናን፣ ቃሹዎን ደእያ አያናቱዎኮ ቢደ፣ ኡንቱንቶ ቃላ ኦዴዳ።

20 ሄ አያናቱ አማራዳ፣ ሆሰፑን አሳቱ ሃላን አቲዳ ማርካብያ ሮሄ ኬጽሽን፣ ጸሳይ ዳንዳዪደ ጋምኤዳ ዋደ፣ ጸሳው አዘዘትቤና አሳ አያናቱዋ።

21 ሄዌ ጽንቃታው ለምሱዋ ግዲደ፣ ህንተና ሀእ አሼ፤ ሱረ ዋዛናፕ ጸሳ ዋሰያዋፕ አትን፣ ቦላ ቅታ ሜጫያዋ ግደና፤ ሄዌ ህንተና የሱስ ክርሰቶስ ሀይቁዋፕ ደንዴዳዋን አሼ።

22 ሳሉዋ ቢደ ጸሳፕ ኡሽቻ ባጋን እ ኡቲደ፣ ኪታንቻ ኡባ፣ ማታና ደእያዋንታን ዋልቃማቱዋ ሞዴ።

4

ጌሻተላን ደአና ደኡዋባ

1 ሄዋ ድራው፣ ክርሰቶስ ባረ አሹዋን ኑዉ ዋየቲዳ ድራው፣ ህንተካ ሄ ቆፋን ዳንጨትተ። አያው ጎፕ፣ ባረ አሹዋን ዋየቲዳ ኡራይ ናጋራ ኦሳያዋ አጌዳ።

2 ሀዋፕ ሰንላን፣ ሀ ሳእን ሸምፑዋና ደአናዉ አቲዳ ዋድያን፣ ጸሳይ ኮይያዋዳን ደአናዉ በሰያዋፕ አትን፣ አሳ አሙዋዳን ደአናዉ በሰና።

3 አያው ጎፕ፣ አማነና አሳይ ኦላናዉ ደሰያዋ ህንተ ኦሊደ፣ ዋሹማናዉ ካጄልያዋን፣ አሙዋን፣ ማሉዋን፣ የላን፣ ኡሻን፣ ፖክያ ኤቃዉ ጎይንያዋን፣ ደኤዳ ካስ አዴዳ ዋዲ ህንተንቶ ግደናዋ።

4 አማነና አሳና ህንተ ሾራይ ባይና ኦሱዋ እትፕ ኦፍ ድራው ማላለቲደ፣ ህንተና ቦሪኖ።

5 ሸን ኡንቱንቱ ፓጻ ደእያ አሳ ቦላን ሀይቁዳ አሳ ቦላ ፕርዳናዉ ጊግ ኡቲዳ ጸሳዉ ዛሩዋ እማና።

6 ሀይቁዳ አሳይ * ባረ አሳተላን አሳይ ፕርደትያዋዳን ፕርደታናዉን ቃይ አያናን ጸሳይ ደእያዋዳን ደአናዉ፣ ዋንጋላ ሞሽራቹ ኡንቱንቶ ሄዋ ኦደቲዳ።

ጸሳይ እሜዳ እሞታቱዋ ሎይሐ አይሰያዋ

7 ኡባባዉካ ዉርሰላይ ማታቲዳ። ሄዋ ድራው፣ ጸሳ ዋሳናዉ ቆፋን ጌዪደ፣ ህንተና ናግተነ ሞንተ።

8 ሲቁ ዳሮ ናጋራ ካምያ ድራው፣ ኡባባፕ አሊደ እቱ እቱዋና ዋዛናፕ ሲቀትተ።

9 ዙዙሙናን እቱ እቱዋ እማላተላን ሞክተ።

3:20 ዶመላ 6:1—7:24 * 4:6 ሀይቁዳ አሳይ፡- የሱሳ አማናፕ ካሰና ሀይቁዳዋንታ ዋይ ሮሄ ዋደ አሳቱዋ። 3:19 ጴላተ። 4:8 ሊም. 10:12

10 ህንተ ሁጲያን ሁጲያን ጸሳጥ ዲማ ዲማ አጼ ከካተላ አኩዳዋዳንካ፣ ጸሳ ዲማ እሙዋ ሀዳራ ሎይሐ ከሰያዋንቱዳን፣ እቱ እቶ ኦሐተ።

11 የሱሰ ክርሰቶሳ ባጋና ኡባባን ጸሳይ ጋላተታና ማላ፣ ኦንነ ኦድያዋ ግደፕ፣ ቃላ ጸሳጥ እኪደ ኦድያዋዳን ኦድ። ቃይ ኦንነ ማድያዋ ግደፕ፣ ጸሳይ አዉ እምያ ዋልቃን ማዶ። ቦንቹነ ጎዳተላይ ጸሳዉ መጅናፕ መጅናዉ ግደ። አመንእ።

መቼዋ ዋደ ሞንያዋ

12 ታ ሲቃቶ፣ ህንተ ግደን ታማዳን ጉዲደ ፓጭያ ዋዪ ይያዋ ኦራሳባይ ህንያዋዳን ማላለቶፕተ።

13 ሸን ክርሰቶሳ ቦንቹ ቤትያ ዋደ ህንተ ናሸታና ማላ፣ አናና ዋየትያዋን ናሸትተ።

14 አሳይ ህንተና ክርሰቶሳ ሱንላ ድራዉ ቦርያዋ ግደፕ፣ ህንተ አንጀቱዳዋንታ፣ አያዉ ጎፕ፣ ቦንቾ አያናይ፣ ጸሳ አያናይ፣ ህንተ ቦላ ሸምፓና።

15 ህንተፕ ኦንነ ሸምፕዋ ዋዪዳዋዳን፣ ዋይ ካይሱዋዳን፣ ዋይ ኢታባ ኦሴዳ አሳዳን፣ ዋይ ሀራ አሳ የዉዋ ገሌዳዋዳን ዋየቶፕ።

16 ሸን ኦንነ ክርሰታንያ ግድያ ድራዉ ዋየቶፕ፣ ክርሰቶሳ ሱንላ ድራዉ፣ ጸሳ ጋላታናፕ አትን፣ ዬላቶፕ።

17 አያዉ ጎፕ፣ ፕርዳይ ጸሳ ጎልያን ደመትያ ዋዲ ጋኬዳ። ቃይ ሄ ፕርዳይ ኮይሮ ኑ ቦላ ደመትያዋ ግደፕ፣ አ ዋንጋላዉ አዛዘተናዋንቱ ዉርሰሳይ አያ ግዳኔ?

18 ጽሎ አሳይ ቱጋን አትያዋ ግደፕ፣ ማካላንቻይነ ናጋራንቻይ ያትና ዋናኔ?

19 ሄዋ ድራዉ ቃይ፣ ጸሳይ ጌዳዋዳን ዋየትያዋንቱ ሎኦባ ኦሴደ፣ ባረንቱ ሸምፕዋ ሀዳራ ባረና መጴዳ አማነትያ ጸሳዉ እምኖ።

5

ጸሳ አሳ አይሳናዉ እመቲዳ ዞርያ

1 ሰም ታን ዋሳ ጎልያ ጭማቱዋና ጭማ ግድያዌን፣ ክርሰቶሳ ዋይያ ማርካትያዌ፣ ቃይ ቆንጫና ቦንቹዋ ሻካናዌ ህንተ ግደን ደእያ ጭማቱዋ ዞራይ።

2 ህንተ ግድን ደእያ ጸሳ ዉድያ ጸሳይ ኮይያዋዳን ሄሞተ። ደሱዋናፕ ኣትን፣ ዋልቃን ግደና። ቃይ ህንተ ጎኡ ጸላላ ዴለናን፣ ሎኦ ቆፋን ሄሞተ።

3 ዉደዉ ህንተ ሌሞሱዋ ግድተፕ ኣትን፣ ህንተ ሄሞያዋንታ ዋልቃን ሄሞፕተ።

4 ቃይ ሄሞያዋንቱ ካፑ ቆንጭያ ዋደ፣ ባየና ቦንቾ ካላቻ ህንተ ኣካና።

5 ሄሞዳንካ ያላጋ ኣሳቶ፣ ጭማቶ ሞደትተ። ኡባይካ እቱ እቶ ኣላናዉ ህንተ ሁጺያ ካዉሽያዋ ኣፍላዳን ማይተ። ኣያዉ ጎፕ፣ ጸሳይ ኡቶረትያዋንታ እጼ፤ ሽን ባረና ካዉሽያዋንቶ ኣቶ ኬካተላ እጫ።

6 ጸሳይ ባረ ሎኦ ዋድያን ህንተና ቶቁ ኣላና ማላ፣ ዋልቃማ ጸሳ ኩሽያፕ ጋርሳና ህንተና ቶቶተ።

7 እ ህንተንቶ ቆፕያ ድራዉ፣ ህንተና ህርግሰያ ኡባባ ኣ ቦላ ኣልተ።

8 ጸላህያ ካፑ፣ ህንተ ሞርኪ፣ ሞትያ ኡራ ኮዪደ፣ ጉድያ ጋሙዋዳን ህንተ ዩሹዋን ዩይያ ድራዉ ናገትተነ ቤጎትተ።

9 ሳኣን ደእያ ህንተ እሻቱ ሄሞዳን ዋየትያዋ ኤሪደ፣ ኣማኑዋን ሞኒደ፣ ኣናና ኤቀትተ።

10 እቶ ኬካተላ ኡባ ጸሳይ፣ ባረ መድና ቦንቾ ክርሰቶሰ የሱሳ ባጋና ህንተና ዴሴዳዌ፣ ኣማራዳ ዋድያ ህንተ ዋየቲዳዋፕ ጉይያን፣ እ ባረ ሁጺዉ ህንተና ሸር ኡራላናን ሞንሳና። ቃይ እ ህንተና ማዳናን ባሰ ኤሳና።

11 ዋልቃይ መድናፕ መድና ጋካናዉ ኣዉ ግደ። ኣመንእ።

ዉርሰሳ ሳሮታ

12 ሀዌ ጸሳ ቱሙ ኣቶ ኬካተላ ግድያዋ ታን ህንተንቶ ማርካታደን ህንተና ዞራደ፣ ህንተንቶ ቃንሳን ጸፊዳ ዳብዳቢያ ኣማንትያ እሻ ጋደ ታን ቆፕያ ሰላሰ ቦላ ኪታድ፤ ሄ ኣቶ ኬካተላን ሞኔድታ።

13 ህንተናና እትፕ ደረቲዳ ባብሎንን * ደእያ ዋሳ ጎልያ ኣሳይነ ታ ናኣይ ማርቆስ ህንተና “ሳሮ ሳሮ” ጊና።

14 ሲቁዋ የረታ የረቲደ፣ እቱ እቱዋ ሳሮትተ።

ህንተዉ፣ ክርሰቶሳና እቱዋ ግዴዳዋንቶ ኡባቶ ሳሮተላይ ግደ። ኣመንእ።

5:5 ሌሞ. 3:34 * 5:13 ባብሎን፡- ሳፃ ማጻፋ ቆፋዳን፣ ሀ ሱንሳይ ሮመ ጉሳ ግደናን ኣገና።

ጌሻ ማጻፋ

The Holy Bible in the Dawro language of Ethiopia

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011-2024, Wycliffe Bible Translators, Inc. and The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c